

115 年全國語文競賽臺灣原住民族語言朗讀文章 【德固達雅賽德克語（原稱：德固達雅語）】 國中學生組 編號 1 號

Pnslawa puruc

Ali ndaan mu mosa qmita tama rudan ka nii, msange ku muuyas de mgeriq rulu tama mu, desun ku na alang qmita tama rudan ma bubu rudan. Ga mhuma paye kana yqeyaq ciida, kika dehuk miyan rhengun alang, mgeriq rulu tama mu moda eluw ssiyo paye. Nii mkmumul hei paye ka ciida, rwahun na bais rulu ka tama ma sbhurun bgihur ka dqeras mu ciida, smkenux ku sknexun bgihur ge asi lux clokah kana hei mu duri. Qmita ku paye, lnlamu kana lukus ga mheyu cceka yqeyaq, “Ima naq meya phido lukus cceka yqeyaq hini wa!” Mesa ku lmngelung.

Dehuk miyan sapah tama rudan de, nii phido lukus rhengun ka bubu rudan. Tuting ku rulu ma tmalang ku mosa memux bubu rudan, mqaras bale qmita yaku duri. Meyah ku siyo bruru, dmayo ku mangal lukus pnheyan na ma phdagun na bobo btakan. Smiling ku bubu rudan “Meya ku eluw sapah ciida, ma niqan seediq ga phido lukus cceka yqeyaq?” Mhulis bubu mu rudan qmita yaku, tmelung tunux mu mesa, Knkawas idas 10 dehuk idas 11 ali nii, mkmumul hei paye de meyah mekan demux paye ka puruc. Ado

mngungu hari ka puruc, kika pheyu lukus pslawa puruc ka seediq, ririh so psklui puruc ka kiya.

Cbeyo we, plbuun daha sudu paye ka btakan, muyu hnyegan na seediq, duma naq ge plkusun daha lukus, taan de so hari bale seediq ga mheyu cceka paye hii. Kiya qmita puruc de miicu meyah smdaling paye dhenu. Mesa ka tama nana, mssbarux smebuc paye ka seediq cbeyo, kika qtaan riyung yqeyaq alang ka sudu paye pslawa puruc nii, haun daha psklui puruc ma dmayo qmlahang ooda yqeyaq duri.

Smebuc paye saya de, ini dai smebuc seediq ka paye, wada daun kikai kana moda smebuc paye saya di. Kiya ini pheyu pslawa puru ma ini hai qtai duri. Seediq hndure nii, blebil negul tqwilaq, pskiya lukus rrako daha ka trasi rrako ka phyegun daha cceka yqeyaq. Ani naq so nii we, mtena kana ooda daha qmlahang paya ta duri. Bobo na, netun namu meyah alang, qmita namu lukus ga cceka yqeyaq de, iya kesi “Ima gaga phido lukus cceka yqeyaq hini wa!”

稻草人

放假時，爸爸載我回部落祖父母家，發現有衣服立在稻田間，心想：「怎麼在田裡曬衣服？」就問奶奶，奶奶：「10 月至 11 月是結穗時節，會引來許多鳥類來吃稻米，會在田間豎立稻草人，小鳥會以為有人在田裡工作就不太敢靠近。」

隨著科技進步，務農方式也在改變，現在可以看到農人用彩線、衣服和陽傘矗立在田中央。稻草人的功能也隨之式微，但是維護農作物的功能是一樣的。